

SHTOJCË I bashkëngjitur në

REFERIM

i Rregullave të Rishikuara të Rregullores së Procedurës dhe të Provave, Dhomës së Specializuar të Gjykatës Kushtetuese

KONFIDENCIALE

Rregulla 19**Mungesa e një gjykatësi**

- (1) [i pandryshuar]
- (2) [i pandryshuar]
- (3) Kur një gjykatës përgjithnjë nuk mund të vijojë të marrë pjesë në një çështje gjyqësore, Kryetari cakton gjykatësin rezervë, ose, sipas rrethanave, një gjykatës tjetër për të vijuar me gjykimin e çështjes.
- (4) Në qoftë se një gjykatës mungon në seancat e një çështjeje në gjykim e sipër, trupi gjykues apo gjykatësit e tjerë në përbërje të atij trupi gjykues, varësisht prej rrethanave, shtyjnë procedimin e çështjes për një periudhë me jo më shumë se tridhjetë (30) ditë pune të njëpasnjëshme. Në rast se gjykatësi nuk ka mundësi të marrë pjesë në çështjen gjyqësore edhe pas përfundimit të periudhës së shtyrjes së procedimit të çështjes gjyqësore, zbatohet paragrafi (3). Në përputhje me nenin 33(4) të Ligjit, gjykatësi i zëvendësuar nuk mund të caktohet në një panel tjetër të së njëjtës çështje gjyqësore, në një fazë të ndryshme.
- (5) [i pandryshuar]

Rregulla 19

Qëllimi dhe përmbajtja: Paragrafët (1) dhe (2) mbeten të pandryshuar. Paragrafi i mëparshëm (3) është fshirë. Dy paragrafët vijues (më parë (4) dhe (5), tani të rinumërtuar (3) dhe (4)) janë ndryshuar për të pasqyruar ndryshimin. Paragrafi i mëparshëm (6) (i rinumërtuar (5)) mbetet i pandryshuar.

Konstatimet e marra parasysh: Konkretisht, ndryshimi merr parasysh konstatimet e panelit të Gjykatës Kushtetuese në lidhje me ligjshmërinë e paneleve të përbëra prej dy gjykatësish (para. 40).

Kapitulli 3**Hetimi***Pjesa I: Masat hetimore**Nënpjesa 1: Të përgjithshme***Nënpjesa 1**

Qëllimi dhe përmbajtja: Rregulla 30 është shtjelluar në përputhje me shpjegimin e mëposhtëm. Janë shtuar tri rregulla të reja (31-33) me qëllim pasqyrimin e konstatimeve të panelit të Gjykatës Kushtetuese. Tri rregullat e reja gjenden në nënpjesën 1 (Të përgjithshme), për të qartësuar se janë të zbatueshme në lidhje me çdo masë të marrë sipas nënpjesëve 2, 3 dhe 4.

Rregulla 30**Dispozitë e përgjithshme**

- (1) Gjatë hetimit të një vepre penale brenda juridiksionit të Dhomave të Specializuara, Prokurori i Specializuar mund:
 - (a) të marrë në pyetje viktime, dëshmitarë dhe të dyshuar dhe të regjistrojë deklaratat e tyre;
 - (b) të kryejë hetime në vendngjarje, të mbledhë prova, të kryejë ekspertimin e provave të mbledhura, dhe sipas nevojës, të kryejë veprimtari të tjera hetimore;
 - (c) të kërkojë ndihmën e shteteve të treta dhe të organizatave ndërkombëtare apo subjekteve të tjera;
 - (d) të ndërmarrë masa hetimore të përcaktuara në rregullën 34 deri në rregullën 41.
- (2) Gjatë hetimit, Prokurori i Specializuar vepron çdo herë në përputhje me të drejtat themelore të njeriut, të parapara në Kapitullin II të Kushtetutës dhe garanton:
 - (a) sigurinë dhe mbrojtjen e viktimave, dëshmitarëve dhe personave të tjerë të rrezikuar për shkak të dhënies së informacionit Zyrës së Prokurorit të Specializuar apo bashkëpunimit me Zyrën e Prokurorit të Specializuar; dhe
 - (b) mbrojtjen e privatësisë së cilitdo personi.

Rregulla 30

Qëllimi dhe përmbajtja: Paragrafët (1)(b), (d) dhe (2) janë ndryshuar për të pasqyruar veprimet që ndërmerr Prokurori i Specializuar, në veçanti kufizimet në lidhje me këto veprime, të cilat rregullohen me rregullat vijuese për rastet kur veprimtaria hetimore e Prokurorit të Specializuar mund të cenojë të drejtat themelore të njeriut. Është hequr paragrafi i mëparshëm (3), duke qenë se arsyeja për ekzistencën e këtij paragrafi tani pasqyrohet në rregullën e re 31.

Rregulla 31**Garanci minimale të përgjithshme**

- (1) Një panel autorizon ose, kur është e zbatueshme, Prokurori i Specializuar ndërmerr masa hetimore të cilat mund të cenojnë të drejtat themelore të njeriut të parapara në Kapitullin II të Kushtetutës. Masa të tilla mund të autorizohen ose ndërmerren sipas rastit, në qoftë se duke mbajtur parasysh të gjitha rrethanat përkatëse, përmbushen garancitë minimale të mëposhtme:
 - (a) plotësohen kushtet përkatëse të përcaktuara në rregullën 34 deri në rregullën 41;
 - (b) masat hetimore janë të domosdoshme për hetimin; dhe
 - (c) ndërhyrja e shkaktuar në të drejtën e cilitdo personi për integritet personal, privatësi apo pronë, është proporcionale me qëllimin legjitim të hetimit dhe nuk mohon thelbin e të drejtës së garantuar.
- (2) Në rast se autorizon masa hetimore sipas paragrafit (1), paneli mund të urdhërojë Prokurorin e Specializuar që të dorëzojë informacion në lidhje me zbatimin e këtyre masave, si edhe në lidhje me materialin e mbledhur në bazë të rregullës 34 deri në rregullën 41, në mënyrën dhe brenda afatit që përcakton paneli.
- (3) Informacioni i siguruar në kontekstin e marrëdhënieve profesionale apo marrëdhënieve të tjera konfidenciale përcaktuar në rregullën 111, konsiderohet i privilegjuar dhe nuk u nënshtrohet masave hetimore, përveç nëse statusi i privilegjuar keqpërdoret për të kryer një veprë penale brenda juridiksionit të Dhomave të Specializuara dhe provat që kërkohen, kanë kontribuar në kryerjen e asaj veprë penale. Në një rast të tillë, rregulla 33(1)(a)(ii) zbatohet *mutatis mutandis*.
- (4) Sipas nevojës, paneli mund të përcaktojë edhe garanci të tjera mbrojtëse.

Rregulla 31 (e re)

Qëllimi: Rregulla 31 është shtuar për të përcaktuar garancitë minimale të përgjithshme, të zbatueshme në lidhje me masat e parapara në nënpjesët 2, 3 dhe 4, në të cilat trajtohen: masat hetimore të posaçme (rregullat 34-36), kontrollimi dhe sekuestrimi (rregulla 37-39), zhvarrosja (rregulla 40) dhe mbledhja e materialit trupor (rregulla 41).

Përmbajtja: Paragrafi (1) parashtron se masa të tilla mund të ndërmerren vetëm me autorizim të panelit, ose, kur është e zbatueshme, drejtpërsëdrejti nga Prokurori i Specializuar. Në të njëjtin paragraf më tej parashtrihen kushtet e përgjithshme që duhen plotësuar, pavarësisht nëse masat janë autorizuar prej panelit apo janë marrë drejtpërsëdrejti prej Prokurorit të Specializuar pa autorizim paraprak. Gjithashtu, paragrafi (2) i rregullës 31 përcakton si kusht të përgjithshëm që panelit t'i raportohet në lidhje me zbatimin e masave dhe materialet e mbledhura apo të sekuestruara, në qoftë se paneli ka vendosur për një gjë të tillë. Rregulla më tej parashtron garancitë në lidhje me materialin e privilegjuar (para. (3)). Paragrafi (4) është një dispozitë e zbatueshme gjerësisht e cila i mundëson panelit që të përcaktojë çdo garanci tjetër të nevojshme, duke mbajtur parasysh rrethanat konkrete të çështjes përkatëse.

Konstatimet e marra parasysh: Konkretisht, në rregullën 31 janë marrë parasysh konstatimet e panelit të Gjykatës Kushtetuese në lidhje me standardet e zbatueshme në vijim: disponueshmëria dhe parashikueshmëria e ligjit, domosdoshmëria, proporcionaliteti, masat të cilat nuk mohojnë thelbin e të drejtës së garantuar (para. 60-64), si edhe në lidhje me garanci

të tjera mbrojtëse që mund të jenë të zbatueshme (para. 71, 74). Gjithashtu, rregulla 31 bazohet në jurisprudencën e Gjykatës Evropiane për Të Drejtat e Njeriut në lidhje me nenin 8.

Rregulla 32

Mbajtja, ruajtja dhe mbrojtja e materialit të mbledhur apo të sekuestruar sipas rregullës 34 deri në rregullën 41

- (1) Materiali i mbledhur apo i sekuestruar si rezultat i zbatimit të një mase të paraparë në rregullën 34 deri në rregullën 41, mbahet, ruhet dhe mbrohet në mënyrën e duhur. Çdo vendim i një paneli për autorizimin e një mase të tillë përmban:
 - (a) procedurën dhe masat paraprake për ruajtjen, mbrojtjen, dhe kur është e zbatueshme transferimin e materialit të mbledhur apo të sekuestruar;
 - (b) kohëzgjatjen e mbajtjes së materialit të mbledhur apo të sekuestruar, dhe kur është e zbatueshme procedurën për ruajtjen e tij sipas rregullës 71; dhe
 - (c) udhëzime dhe afate për kthimin ose, kur është e zbatueshme, asgjësimin e materialit të mbledhur apo të sekuestruar.
- (2) Rregulla 206 zbatohet *mutatis mutandis*. Kërkesat e autoriteteve të Kosovës mund të miratohen në varësi të masave mbrojtëse, nëse është e nevojshme.

Rregulla 32 (e re)

Qëllimi: Rregulla 32 është shtuar për të përcaktuar kushtet e përgjithshme për mbajtjen, ruajtjen dhe mbrojtjen e materialit të mbledhur apo të sekuestruar gjatë zbatimit të masave hetimore në bazë të rregullave 34-41, respektivisht gjatë zbatimit të masave hetimore të posaçme (rregullat 34-36), kontrollimit dhe sekuestrimit (rregullat 37-39), zhvarrosjes (rregulla 40) dhe mbledhjes së materialeve trupore (rregulla 41).

Përmbajta: Paragrafi (1) i rregullës 32 parashtron se çdo vendim i një paneli për autorizimin e masave në bazë të rregullave 34-41 (pavarësisht nëse masat autorizohen paraprakisht apo më pas) duhet të përmbajë procedurat dhe masat paraprake konkrete në lidhje me mbajtjen, ruajtjen, transferimin dhe mbrojtjen e materialit të mbledhur apo të sekuestruar, si edhe udhëzime në lidhje me kohëzgjatjen e mbajtjes së materialit. Rregulla 32, në paragrafin (2) gjithashtu përcakton një kornizë për bashkëpunim në lidhje me materialin e mbledhur apo të sekuestruar.

Konstatimet e marra parasysh: Në rregullën 32 janë marrë parasysh konstatimet e panelit të Gjykatës Kushtetuese në lidhje me mbajtjen dhe ruajtjen e një materiali të tillë (para. 66, 73).

Rregulla 33

Kthimi ose asgjësimi i materialit të mbledhur apo të sekuestruar sipas rregullës 34 deri në rregullën 41

- (1) Materiali i mbledhur apo i sekuestruar sipas rregullës 34 deri në rregullën 41 kthehet ose asgjësohet:
- (a) menjëherë,
 - (i) në qoftë se një material i tillë nuk lidhet me qëllimin e hetimit për të cilin është mbledhur, veçse kur është i rëndësishëm për hetimin e një vepre penale tjetër brenda juridiksionit të Dhomave të Specializuara; ose
 - (ii) në qoftë se një material i tillë është mbledhur në mënyrë të paligjshme, veçanërisht nëse paneli nuk miraton, ose nuk nxjerr vendim në lidhje me një urdhër të Prokurorit të Specializuar sipas rregullës 36, ose rregullës 38;
 - (b) kur një material i tillë pushon së qeni i rëndësishëm në lidhje me qëllimin për të cilin është mbledhur, duke mbajtur parasysh:
 - (i) llojin dhe peshën e veprës penale;
 - (ii) nevojat e hetimeve në kryerje e sipër; dhe
 - (iii) nëse personi përkatës është i dyshuar, i shpallur fajtor, i shpallur i pafajshëm ose një person i tretë; ose
 - (c) nëse kanë kaluar afatet e parashkrimit të ndjekjes penale të përcaktuara në nenin 106 të Kodit Penal të Kosovës.
- (2) Në varësi të paragrafit (1), materiali i mbledhur apo i sekuestruar sipas rregullës 34 deri në rregullën 41:
- (a) kthehet prej Prokurorit të Specializuar *proprio motu*, ose me vendim të panelit; ose
 - (b) asgjësohet prej Prokurorit të Specializuar vetëm me vendim të panelit.
- Evidentimi i çdo kthimi ose asgjësim të tillë të materialit është i detyrueshëm.
- (3) Personi përkatës njoftohet për çdo vendim për kthimin, ose asgjësimin e materialit të paktën nëntëdhjetë (90) ditë përpara zbatimit të një vendimi të tillë, ose në përputhje me një vendim tjetër. Personi në fjalë mund të kërkojë rishikimin e një vendimi të tillë.

Rregulla 33 (e re)

Qëllimi: Rregulla 33 është shtuar për të përcaktuar kushtet e përgjithshme për kthimin dhe asgjësimin e materialit të mbledhur apo të sekuestruar gjatë zbatimit të masave hetimore në bazë të rregullave 34-41, respektivisht gjatë zbatimit të masave hetimore të posaçme (rregullat 34-36), kontrollimit dhe sekuestrimit (rregullat 37-39), zhvarrosjes (rregulla 40) dhe mbledhjes së materialeve trupore (rregulla 41).

Përmbajtja: Paragrafi (1) i rregullës 33 parashikon tri mundësi në lidhje me kohën e asgjësimit dhe kthimit të materialit të mbledhur ose sekuestruar, në varësi të rrethanave konkrete. Paragrafi (2) saktëson se, megjithëse materiali i mbledhur ose i sekuestruar mund të kthehet nga Prokurori i Specializuar *proprio motu* ose me vendim të një paneli, ky material mund të asgjësohet vetëm me autorizim të panelit. Paragrafi (3) përcakton edhe një garanci mbrojtëse

më shumë për cilindo person në lidhje me asgjësimin ose kthimin e planifikuar të materialit përkatës, përveç garancive të tjera që parashikon Ligji apo Rregullorja (neni 49(3) i Ligjit; rregulla 29).

Konstatimet e marra parasysh: Konkretisht, në rregullën 33 janë marrë parasysh konstatimet e panelit të Gjykatës Kushtetuese në lidhje me mungesën e dispozitave që rregullojnë kohëzgjatjen e mbajtjes së materialit të mbledhur ose të sekuestruar dhe asgjësimin e një materiali të tillë (para. 66, 73, 105). Gjithashtu, rregulla 33 bazohet në jurisprudencën e Gjykatës Evropiane për Të Drejtat e Njeriut në lidhje me nenin 8.

Nënpjesa 2: Masa hetimore të posaçme

Rregulla 34 (më parë rregulla 31)

Kushtet për marrjen e masave hetimore të posaçme

- (1) Në varësi të rregullës 31(1), masa hetimore të posaçme mund të ndërmerren vetëm nëse ekziston dyshim i bazuar se është kryer, është duke u kryer apo do të kryhet një vepër penale përcaktuar në nenin 13 ose 14 të Ligjit, ose vepër penale përcaktuar në nenet 388(2) dhe (3), 393, 394(1), (4) dhe (5), 395, 396, 397(1), 400(2) deri në (4), 409, 410, 423 ose 424, të Kodit Penal të Kosovës, siç përmendet në nenin 15(2) të Ligjit.
- (2) Masa hetimore të posaçme mund të ndërmerren kur provat nuk mund të sigurohen me anë të ndonjë mase tjetër më pak ndërhyrëse por po aq të efektshme, dhe merren në lidhje me një person ose vend konkret, kur ekziston dyshim i bazuar se:
 - (a) personi në fjalë ka kryer, është duke kryer ose do të kryejë cilëndo vepër penale nga paragrafi (1), brenda juridiksionit të Dhomave të Specializuara;
 - (b) personi në fjalë merr ose përcjell komunikim për të dyshuarin apo të akuzuarin, ose prej të dyshuarit apo të akuzuarit, ose mjeti i tij i komunikimit përdoret prej të dyshuarit ose të akuzuarit;
 - (c) një vend konkret përdoret, apo do të përdoret për kryerjen e një vepre penale nga paragrafi (1), brenda juridiksionit të Dhomave të Specializuara; ose
 - (d) provat në lidhje me një vepër penale nga paragrafi (1) mund të zbulohen në një vend konkret dhe provat e kërkuara janë të domosdoshme për hetimin.
- (3) Personi përmendur në paragrafin (2) njoftohet nga Prokurori i Specializuar për cilëndo masë të ndërmarrë në lidhje me të në bazë të rregullës 34 deri në rregullën 36, me kusht që kjo të mos rrezikojë qëllimin e masës së ndërmarrë, ose kryerjen e procedurave.

Rregulla 34 (më parë rregulla 31)

Qëllimi: Rregulla 34 (më parë rregulla 31) parashton kushtet konkrete në lidhje me masat hetimore të posaçme dhe zbatohet bashkërisht me rregullat 31-33.

Përmbajtja: Në paragrafin (1) përmenden veprat penale përkatëse në lidhje me të cilat mund të ndërmerren masa hetimore të posaçme. Gjatë përzgjedhjes së këtyre veprave penale u morën parasysh konteksti dhe rrethanat konkrete brenda të cilave Dhomat e Specializuara kryejnë veprimtarinë e tyre. Gjatë rishikimit të rregullës 34(1), vëmendje e posaçme u është kushtuar rreziqeve të mundshme për personat që kanë të bëjnë me Dhomat e Specializuara, të cilat mund të kenë për pasojë dëme të rënda për këta persona, apo të pengojnë në masë të qenësishme kryerjen e procedurave gjyqësore. Gjithashtu, është marrë parasysh edhe gjasa e efikasitetit të masave hetimore të posaçme për zbulimin, hetimin dhe procedimin e veprave penale të cilat mund të pengojnë zbatimin e mandatit të Dhomave të Specializuara. Përzgjedhja e veprave penale të përmendura në rregullën e rishikuar 34(1) është bërë mbi këtë bazë. Paragrafi (2) përcakton kategoritë e personave në lidhje me të cilët mund të ndërmerren masa hetimore të posaçme. Paragrafi (3) është shtuar për të përcaktuar detyrimin e Prokurorit të Specializuar për njoftimin e personave në lidhje me të cilët ndërmerren masa të tilla.

Konstatimet e marra parasysh: Konkretisht, në rregullën 34 janë marrë parasysh konstatimet e panelit të Gjykatës Kushtetuese në lidhje me mungesën e dispozitave që përcaktojnë llojin e veprës (penale) (para. 69), kategoritë e personave (para. 70) dhe njoftimin e këtyre personave (para. 73) për masat hetimore të posaçme. Gjithashtu, rregulla 34 bazohet në jurisprudencën e Gjykatës Evropiane për Të Drejtat e Njeriut në lidhje me detyrimin e njoftimit.

Rregulla 35 (më parë rregulla 32)

Masa hetimore të posaçme të autorizuara prej një paneli

- (1) Për marrjen e masave hetimore të posaçme, Prokurori i Specializuar kërkon autorizimin e një paneli.
- (2) Kur është bindur se janë plotësuar kushtet e rregullës 31(1) dhe rregullës 34, paneli mund të nxjerrë një vendim për autorizimin e masave hetimore të posaçme të kërkuara, në të cilin përmenden:
 - (a) periudha kohore për të cilën jepet autorizimi, në varësi të rrethanave përkatëse të hetimit, e cila nuk mund të zgjasë më shumë se gjashtëdhjetë (60) ditë;
 - (b) procedura e raportimit në lidhje me zbatimin e masave të autorizuara dhe materialin e mbledhur, qoftë brenda afateve të rregullta, ose me përfundimin e masave, varësisht nga vendimi i panelit, në përputhje me rregullën 31(2);
 - (c) autorizimi për hyrje në një vend konkret, në rast se është e nevojshme për zbatimin, vijimin ose përfundimin e masës hetimore përkatëse. Për një autorizim të tillë nuk është i detyrueshëm njoftimi i të dyshuarit apo të akuzuarit, përveç nëse në rrethanat përkatëse të çështjes, paneli gjykon se njoftimi i të dyshuarit apo të akuzuarit nuk rrezikon efektshmërinë e masës së kërkuar.
- (3) Periudha kohore përcaktuar në paragrafin (2)(a) mund të zgjatet më së shumti 12 muaj, në qoftë se me gjithë zellin e duhur të Prokurorit të Specializuar qëllimi i hetimit nuk është realizuar dhe ende përmushen kushtet e parapara në rregullën 31(1) dhe rregullën 34.

- (4) Në rrethana të jashtëzakonshme të përcaktuara nga faktorë si pesha e veprës penale, kompleksiteti i hetimit, ose konstatimi se me gjithë zellin e duhur Prokurori i Specializuar ka zbuluar rrethana të reja pak para përfundimit të masës përkatëse, periudha e përcaktuar në paragrafin (3) mund të zgjatet edhe më tej. Paneli rishikon rregullisht masat e miratuara, të paktën çdo gjashtëdhjetë (60) ditë, dhe mund t'i përfundojë ato në çdo kohë, në qoftë se kushtet përkatëse nuk përmbushen më dhe në qoftë se kjo diktohet nga detyrimi i respektimit të të drejtave të njeriut.

Rregulla 35 (më parë rregulla 32)

Qëllimi: Rregulla 35 (më parë rregulla 32) përcakton kushtet përkatëse që duhen përmbushur kur një panel autorizon masa hetimore të posaçme dhe zbatohet bashkërisht me rregullat 31-33 dhe 34.

Përmbajtja: Rregulla 35 është ndryshuar për të rregulluar vetëm ato kushte që lidhen konkretisht me masat hetimore të posaçme (për këtë arsye, një pjesë e paragrafit të mëparshëm (2) është përfshirë në rregullën e re 32, dhe rrjedhimisht zbatohet në lidhje me të gjitha masat në nënpjesët 2, 3 dhe 4). Gjithashtu, paragrafi (2)(b) parashtron detyrimin për t'i raportuar panelit në lidhje me zbatimin e masave dhe materialin e mbledhur. Paragrafët (2)(a), (3) dhe (4) të rregullës 35 përcaktojnë një sistem trenivelësh të vendosjes dhe zgjatjes së masave hetimore të posaçme. Niveli i parë (paragrafi 2(a)) përcakton afatin fillestar prej më së shumti gjashtëdhjetë ditësh; niveli i dytë (paragrafi (3)) lejon zgjatjen e masave të tilla me më së shumti 12 muaj, por vetën kur qëllimi i hetimit, me gjithë zellin e duhur, nuk është realizuar dhe ende përmbushen kushtet përkatëse; niveli i tretë (paragrafi (4)) hap mundësinë për një zgjatje të mëtejshme të jashtëzakonshme të këtij afati, por vetëm në rrethana rreptësisht të përkufizuara, të cilat përshkruhen në paragrafin 72 të Aktvendimit të panelit të Gjykatës Kushtetuese. Gjithashtu, në rast të një zgjatjeje të tillë afati, është i detyrueshëm një rishqyrtim periodik i masave të tilla, të paktën çdo gjashtëdhjetë ditë, me qëllim përfundimin e tyre në qoftë se nuk përmbushen më kushtet përkatëse dhe kjo diktohet prej detyrimit të respektimit të të drejtave të njeriut.

Konstatimet e marra parasysh: Konkretisht, në rregullën 35 janë marrë parasysh konstatimet e panelit të Gjykatës Kushtetuese në lidhje me kohëzgjatjen dhe vijimësinë e masave hetimore të posaçme (para. 72). Gjithashtu, rregulla 35 bazohet në jurisprudencën e Gjykatës Evropiane për Të Drejtat e Njeriut në lidhje me kohëzgjatjen dhe vijimësinë e masave të tilla.

Rregulla 36 (më parë rregulla 33)

Masa hetimore të posaçme të urdhëruara prej Prokurorit të Specializuar

- (1) Prokurori i Specializuar mund të urdhërojë masa hetimore të posaçme pa autorizimin e një paneli në qoftë se janë përmbushur kushtet e përcaktuara në rregullën 31(1) dhe rregullën 34, dhe:
- (a) zbatimi i menjëhershëm i masave të tilla është i domosdoshëm për mundësimin e mbledhjes së provave të cilat nuk mund të sigurohen në një mënyrë tjetër; dhe
 - (b) çdo vonesë si rezultat i kërkimit të autorizimit prej një paneli do të rrezikonte hetimin, apo sigurinë e një dëshmitari, viktime ose personi tjetër të rrezikuar.

- (2) Prokurori i Specializuar i paraqet panelit kërkesë për miratimin e masave të tilla menjëherë dhe jo më vonë se njëzet e katër (24) orë pas fillimit të zbatimit të tyre.
- (3) Paneli që shqyrton kërkesën miraton masat hetimore të posaçme brenda tri (3) ditësh nga paraqitja e kërkesës, vetëm nëse bindet se janë përmbushur kushtet e paragrafit (1). Rregulla 35 zbatohet *mutatis mutandis*.
- (4) Në qoftë se një kërkesë e tillë nuk është paraqitur, nuk është miratuar, ose paneli nuk ka nxjerrë vendim në lidhje me të, urdhri i Prokurorit të Specializuar për masa hetimore të posaçme pushon së qeni në fuqi dhe Prokurori i Specializuar ndërpret menjëherë masat përkatëse. Materiali i mbledhur në qoftë se ka, nuk mund të përdoret për hetim apo ndjekje penale.

Rregulla 36 (më parë rregulla 33)

Qëllimi: Rregulla 36 (më parë rregulla 33) është ndryshuar për të përkufizuar qartë rrethanat kur Prokurori i Specializuar mund të ndërmarrë masa hetimore të posaçme pa autorizim paraprak të panelit dhe zbatohet bashkërisht me rregullat 31-33 dhe 34.

Përmbajtja: Rregulla e re 36 përcakton si afatin kohor për paraqitjen e kërkesës prej Prokurorit të Specializuar (para. 2), po ashtu edhe afatin kohor për marrjen e vendimit prej panelit (para. (3)). Paragrafi (4) shërben si garanci mbrojtëse për rastet kur paneli nuk miraton masën e ndërmarrë. Rregulla përcakton se duhen përmbushur si garancitë minimale mbrojtëse të përgjithshme (rregulla 31), po ashtu edhe kushtet përkatëse (rregulla 34).

Konstatimet e marra parasysh: Në rregullën 36 janë marrë parasysh konstatimet e panelit të Gjykatës Kushtetuese parashtruar në paragrafët 60-75.

Nënpjesa 3: Kontrollimi dhe sekuestrimi

Rregulla 37 (më parë rregulla 34)

Kontrollimi dhe sekuestrimi i autorizuar prej një paneli

- (1) Prokurori i Specializuar i kërkon një paneli autorizim për kontrollim dhe sekuestrim në qoftë se në rrethanat konkrete provat nuk mund të sigurohen në një mënyrë tjetër dhe kontrollimi dhe sekuestrimi i kërkuar duket se është e vetmja masë e efektshme për nevojat e hetimit.
- (2) Paneli mund të autorizojë kontrollimin e pronës së një personi ose të vendeve, ambienteve, ose objekteve të tjera në lidhje me të cilat personi në fjalë ka prishmëri të arsyeshme për respektimin e privatësisë, si edhe të autorizojë sekuestrimin e sendeve të gjetura gjatë kontrollimit, në qoftë se:
 - (a) ekziston dyshim i bazuar se personi në fjalë ka kryer, është duke kryer, ose do të kryejë një vepër penale brenda juridiksionit të Dhomave të Specializuara dhe kontrollimi do të rezultojë në arrestimin e atij personi, ose në zbulimin dhe sekuestrimin e provave të nevojshme për hetimin;

- (b) ekziston dyshim i bazuar se kontrollimi do të rezultojë në arrestimin e një të dyshuari; ose
 - (c) kontrollimi është i domosdoshëm për mbledhjen dhe ruajtjen e provave për një vepër penale brenda juridiksionit të Dhomave të Specializuara dhe ekziston dyshim i bazuar se prova të tilla gjenden në pronën, vendin ose objektin që do të kontrollohet.
- (3) Paneli mund të autorizojë kontrollimin e një personi në qoftë se ekziston dyshim i bazuar se kontrollimi do të rezultojë në zbulimin e provave për një vepër penale brenda juridiksionit të Dhomave të Specializuara dhe rrjedhimisht në sekuestrimin e provave të tilla.
- (4) Në rast se bindet se janë përmbushur kushtet e përcaktuara në paragrafët (1) deri në (3), në varësi të rrethanave, si edhe kushtet e parapara në rregullën 31(1), paneli mund të marrë vendim për autorizimin e kontrollimit dhe sekuestrimit i cili përmban:
- (a) kohën, kohëzgjatjen dhe shkallën e kontrollimit dhe sekuestrimit, duke përfshirë të dhëna për personin ose pronën, vendin, ambientet ose objektin në lidhje me të cilat autorizohet masa përkatëse; dhe
 - (b) procedurën e raportimit në lidhje me zbatimin e masës së autorizuar dhe materialin e sekuestruar, në përputhje me rregullën 31(2).
- (5) Paneli mund të përcaktojë edhe kushte të tjera që i gjykon të nevojshme.

Rregulla 37 (më parë rregulla 34)

Qëllimi: Rregulla 37 (më parë rregulla 34) përcakton kushtet përkatëse në lidhje me kontrollimin dhe sekuestrimin e autorizuar prej një paneli dhe zbatohet bashkërisht me rregullat 31-33.

Përmbajtja: Rregulla 37 është ndryshuar duke përfshirë një kriter më të rreptë në lidhje me domosdoshmërinë e kontrollimit dhe sekuestrimit (e vetmja masë e efektshme; para. (1)), kategoritë e personave dhe vendeve (para. (2) dhe (3)) në lidhje me të cilët mund të ndërmerret masa e kontrollimit dhe sekuestrimit, si edhe udhëzimet të cilat duhet të japë paneli përkatës kur autorizon një masë të tillë (para. (4)). Rregulla gjithashtu parashtron një garanci mbrojtëse të përgjithshme në paragrafin (5) e cila i mundëson panelit përcaktimin e kushteve shtesë në qoftë se diktohet prej rrethanave të rastit.

Konstatimet e marra parasysh: Konkretisht, në rregullën 37 janë marrë parasysh konstatimet e panelit të Gjykatës Kushtetuese në lidhje me mungesën e dispozitave për kategoritë e personave (para. 81) dhe kriterin e domosdoshmërisë (para. 82).

Rregulla 38 (më parë rregulla 35)

Kontrollimi dhe sekuestrimi prej Prokurorit të Specializuar

- (1) Bazuar në nenin 35 dhe nenin 39 të Ligjit dhe në përputhje me kushtet e përcaktuara në rregullën 37(1)-(3), Prokurori i Specializuar, pa autorizimin e një paneli, mund të kryejë kontrollimin e një personi ose prone, vendi, ambienti apo objekti, dhe të sekuestrojë përkohësisht çfarëdo sendi të gjetur gjatë kontrollimit në qoftë se:

- (a) personi në fjalë me vetëdije dhe vullnetarisht pajtohet me kryerjen e kontrollimit dhe sekuestrimit;
 - (b) personi në fjalë është kapur duke kryer një veprë penale brenda juridiksionit të Dhomave të Specializuara dhe pas ndjekjes nga afër do të arrestohet; ose
 - (c) një veprim i tillë është i domosdoshëm për të parandaluar rrezikun e menjëhershëm të një dëmi të rëndë dhe të pandreqshëm ndaj personave të tjerë ose pronës.
- (2) Kërkesën për miratimin e kontrollimit dhe sekuestrimit, Prokurori i Specializuar ia paraqet një paneli menjëherë dhe jo më vonë se njëzet e katër (24) orë pas fillimit të kontrollimit dhe sekuestrimit.
 - (3) Paneli që shqyrton kërkesën mund të miratojë kontrollimin dhe sekuestrimin brenda tri (3) ditësh nga paraqitja e kërkesës vetëm nëse bindet se janë plotësuar kushtet e përcaktuara në paragrafin (1).
 - (4) Në qoftë se një kërkesë e tillë nuk është paraqitur, nuk është miratuar, ose paneli nuk ka nxjerrë vendim në lidhje me të, urdhri i Prokurorit të Specializuar për kontrollim dhe sekuestrim pushon së qeni në fuqi dhe Prokurori i Specializuar ndërpret menjëherë kontrollimin dhe sekuestrimin. Materiali i sekuestruar në qoftë se ka, nuk mund të përdoret për hetim apo ndjekje penale.

Rregulla 38 (më parë rregulla 35)

Qëllimi: Rregulla 38 (më parë rregulla 35) përcakton kushtet përkatëse në lidhje me kontrollimin dhe sekuestrimin e ndërmarrë prej Prokurorit të Specializuar pa autorizim paraprak të një paneli dhe zbatohet bashkërisht me rregullat 31-33 dhe 37(1)-(3).

Përmbajtja: Rregulla 38 është ndryshuar për të përkufizuar qartë rrethanat kur Prokurori i Specializuar mund të ndërmarrë masën e kontrollimit dhe sekuestrimit pa autorizim paraprak të panelit. Paragrafi (1) përfshin kushtet e përcaktuara në rregullën 37(1)-(3), si kushte shtesë ndaj kushteve përkatëse të parashtruara në këtë rregull. Rregulla e re rregullon si afatin për paraqitjen e kërkesës për autorizim prej Prokurorit të Specializuar (para. 2), po ashtu edhe afatin për marrjen e vendimit prej panelit (para. (3)). Paragrafi (4) shërben si garanci mbrojtëse për rastet kur paneli në një mënyrë apo tjetër, nuk miraton masën e ndërmarrë.

Konstatimet e marra parasysh: Konkretisht, në rregullën 38 janë marrë parasysh konstatimet e panelit të Gjykatës Kushtetuese në lidhje me kufijtë e kompetencës së Prokurorit të Specializuar për kryerjen e kontrollimit dhe sekuestrimit pa autorizim paraprak (para. 85), rrethanat në të cilat mund të ndërmerren masa të tilla (para. 86) dhe vlerësimin e domosdoshmërisë (dhe proporcionalitetit) të këtyre masave (para. 87).

Rregulla 39 (më parë rregulla 36)

Kryerja e kontrollimit dhe sekuestrimit

- (1) Në varësi të paragrafit (2), kontrollimi dhe sekuestrimi në bazë të rregullës 37, ose rregullës 38, kryhen prej Prokurorit të Specializuar në prani të personit përkatës dhe para kryerjes së kontrollimit dhe sekuestrimit, Prokurori i Specializuar:

- (a) i jep një kopje të legalizuar të vendimit të panelit apo të urdhrorit të Prokurorit të Specializuar personit ndaj të cilit është marrë vendimi ose urdhri përkatës;
- (b) informon personin në fjalë për të drejtat e tij sipas rregullës 42, ose rregullës 43, në varësi të rrethanave;
- (c) siguron që mbrojtësi i personit të jetë i pranishëm gjatë kontrollimit dhe sekuestrimit, përveç nëse personi heq dorë vullnetarisht nga ushtrimi i kësaj të drejte, apo logjikisht nuk mund të pritët prania e mbrojtësit; dhe
- (d) siguron praninë e një vëzhguesi të pavarur i cili shërben si dëshmitar gjatë kryerjes së kontrollimit dhe sekuestrimit.
- (2) Kontrollimi dhe sekuestrimi mund të kryhen edhe pa praninë e personit përkatës në qoftë se ky person nuk mund të gjendet ose refuzon të jetë i pranishëm gjatë kryerjes së kontrollimit dhe kur çdo vonesë në kryerjen e kontrollimit dhe sekuestrimit do të rrezikonte hetimin apo sigurinë ose pronën e një dëshmitari, viktime apo personi tjetër të rrezikuar. Zbatohen paragrafi (1)(c), nëse është e realizueshme, dhe (d). Personi përkatës informohet për kryerjen e kontrollimit dhe sekuestrimit menjëherë pasi të përcaktohet vendndodhja e tij.
- (3) Gjatë kryerjes së kontrollimit dhe sekuestrimit bëhet kujdes që të shmanget çfarëdo dëmtimi i panevojshëm i pronës.
- (4) ¹Prokurori i Specializuar dokumenton kohën e kryerjes, kohëzgjatjen, shkallën, dhe të gjitha hollësitë e tjera të kontrollimit dhe sekuestrimit. ²Në rastet kur paneli ka përcaktuar kushte plotësuese në lidhje me kryerjen e kontrollimit dhe sekuestrimin, dokumentohet edhe zbatimi i kushteve plotësuese. ³Prokurori i Specializuar përpilon listën e inventarit të sendeve të sekuestruara me përshkrim dhe informacion të hollësishëm në lidhje me secilin send të sekuestruar. Prokurori i Specializuar, vëzhguesi i pavarur, personi përkatës dhe mbrojtësi i tij, në qoftë se është i pranishëm, nënshkruajnë listën e inventarit dhe mund të bëjnë vërejtje me shkrim në lidhje me kryerjen e kontrollimit dhe sekuestrimit. Dokumentohet edhe refuzimi i personit përkatës për të nënshkruar dokumentin, si edhe arsyet e refuzimit.
- (5) Prokurori i Specializuar mban dhe ruan sendet e sekuestruara në përputhje me rregullën 32.

Rregulla 39 (më parë rregulla 36)

Qëllimi: Rregulla 39 (më parë rregulla 36) përcakton kushtet e kryerjes së kontrollimit dhe sekuestrimit dhe zbatohet bashkërisht me rregullat 31-33 dhe rregullën 37 ose rregullën 38, në varësi të rrethanave.

Përmbajtja: Rregulla 39 është ndryshuar për të qartësuar se është e zbatueshme si në lidhje me rregullën 37 (më parë rregulla 34), po ashtu edhe me rregullën 38 (më parë 35). Gjithashtu, kjo rregull tani rregullon hollësisht kryerjen e kontrollimit dhe sekuestrimit, si në prani të personit përkatës (para. (1)), po ashtu edhe në mungesë të tij (para. (2)). Rregulla 39 gjithashtu parashtron kushtin e pranisë së një vëzhguesi të pavarur (para. (1)(d)) dhe përshkruan rolin e tij (para. (4)), pavarësisht nga prania ose mungesa e personit ndaj të cilit zbatohet masa përkatëse. Paragrafët (3) deri në (5) rregullojnë me më shumë hollësi kryerjen e kontrollimit dhe sekuestrimit.

Konstatimet e marra parasysh: Konkretisht, në rregullën 39 janë marrë parasysh konstatimet e panelit të Gjykatës Kushtetuese në lidhje me zbatueshmërinë e kësaj rregulle (para. 91, 93) dhe të drejtën e personit përkatës për t'u informuar për të drejtat që i takojnë (para. 92). Gjithashtu, rregulla 39 bazohet në jurisprudencën përkatëse të Gjykatës Evropiane për Të Drejtat e Njeriut në lidhje me kryerjen e kontrollimit dhe sekuestrimit.

Nënpjesa 4: Masa të tjera

Rregulla 40 (më herët rregulla 37)

Zhvarrosja dhe ekzaminimi *post-mortem*

[e pandryshuar]

Rregulla 41 (më parë rregulla 38)

Mbledhja e materialeve trupore për ekspertizë mjeko-ligjore

- (1) Mbledhja e qimeve, pështymës, mostrave të gjakut, indeve trupore ose materialeve të tjera të ngjashme, të cilat nuk mund të merren pa kontakt fizik ose ndërhyrje trupore në trupin e një personi, mund të kryhet me miratim me shkrim dhe të dhënë vullnetarisht të personit përkatës, pasi personi në fjalë të jetë këshilluar me mbrojtësin e vet, ose me vetëdije të ketë hequr dorë nga e drejta për t'u këshilluar me mbrojtësin e vet.
- (2) Në mungesë të një miratimi të tillë, një panel mund të autorizojë masat e parapara në paragrafin (1) në lidhje me një person, në qoftë se:
 - (a) ekziston dyshim i bazuar se personi në fjalë ka kryer një veprë penale brenda juridiksionit të Dhomave të Specializuara; ose
 - (b) zbulimi i të vërtetës kërkon që të përcaktohet nëse në trupin e personit përkatës ka gjurmë apo pasoja të një veprë penale brenda juridiksionit të Dhomave të Specializuara.
- (3) Për marrjen e vendimit, dhe sipas nevojës, pasi të ketë dëgjuar personin në fjalë, paneli merr parasysh, ndër të tjera:
 - (a) llojin dhe peshën e veprës penale;
 - (b) në qoftë se materialet që kërkohen mund të sigurohen me anë të një metode tjetër;
 - (c) procedurën përkatëse për kryerjen e ekspertizës mjeko-ligjore; dhe
 - (d) pasojat për shëndetin e personit në fjalë.
- (4) Mbledhja e mostrave të gjakut, indeve trupore ose materialeve të tjera të ngjashme mund të kryhet vetëm prej një eksperti të kualifikuar mjekësor.
- (5) Materiali i përmendur në paragrafët (1) dhe (2) nuk përdoret për asnjë qëllim tjetër, përveç se për hetimin dhe ndjekjen e veprave penale brenda juridiksionit të Dhomave të Specializuara.

Rregulla 41 (më parë rregulla 38)

Qëllimi: Rregulla 41 (më parë rregulla 38) rregullon mbledhjen e materialeve trupore të cilat mund të merren me kontakt fizik ose ndërhyrje trupore dhe zbatohet bashkërisht me rregullat 31-33.

Përmbajtja: Rregulla 41 është ndryshuar për të përcaktuar qartë fushëveprimin e saj, përkatësisht mbledhjen e materialeve trupore me anë të kontaktit fizik ose ndërhyrjes trupore (para. (1)), kategoritë e personave në lidhje me të cilët mund të ndërmerren masa të tilla në mungesë të pëlqimit prej tyre (para. (2)), si edhe faktorët që paneli duhet të marrë parasysh gjatë shqyrtimit gjyqësor para autorizimit të masave të tilla (para. (3)). Rregulla 41 gjithashtu përcakton garancitë mbrojtëse në lidhje me mbledhjen e disa mostrave të caktuara (para. (4)) dhe përdorimin e materialeve të mbledhura (para. (5)). Siç u theksua më lart, në një rast të tillë njëkohësisht zbatohet edhe rregulla 33 në lidhje me asgjësimin dhe kthimin e materialeve të mbledhura.

Konstatimet e marra parasysh: Konkretisht, në rregullën 41 janë marrë parasysh konstatimet e panelit të Gjykatës Kushtetuese në lidhje me dallimin midis mbledhjes së materialeve me dhe pa ndërhyrje trupore (para. 98), mungesën e autorizimit për mbledhjen e materialeve me anë të ndërhyrjes trupore (para. 99), mbikëqyrjen gjyqësore (para. 103) dhe kohëzgjatjen e mbajtjes së materialeve të tilla (para 105).

Rregulla 57 (më parë rregulla 54)**Rishikimi dhe rivlerësimi i mbajtjes në paraburgim**

- (1) [i pandryshuar]
- (2) [i pandryshuar]
- (3) [i pandryshuar]
- (4) Në bazë të një kërkesë sipas paragrafëve (2) ose (3), trupi gjykues mund të përcaktojë kushte të lirimimit që i gjykon të përshtatshme për të garantuar praninë e të akuzuarit gjatë procesit gjyqësor, në përputhje me nenin 41(12) të Ligjit. Trupi gjykues dëgjon parashtrimet e një shteti të tretë në qoftë se personi i paraburgosur kërkon të lirohet në territorin e atij shteti. Personi i paraburgosur nuk lirohet në territorin e shtetit të tretë pa pëlqimin e atij shteti. Vendimi merret sa më shpejt që të jetë e mundshme dhe jo më vonë se tri (3) ditë pas parashtrimit të fundit.

Rregulla 57 (më parë rregulla 54)

Qëllimi dhe përmbajtja: Paragrafi (4) i rregullës 57 (më parë rregulla 54) është ndryshuar për të saktësuar se lirimi i një personi të paraburgosur nuk varet nga pëlqimi i një shteti të tretë; një pëlqim i tillë është i domosdoshëm vetëm për lirimin e personit të paraburgosur në territorin e atij shteti.

Konstatimet e marra parasysh: Konkretisht, në rregullën 57 janë marrë parasysh konstatimet e panelit të Gjykatës Kushtetuese në lidhje me formulimin e këtij paragrafi (para. 120-121).

Rregulla 137 (më parë rregulla 134)**Dispozita të përgjithshme**

- (1) [i pandryshuar]
- (2) [i pandryshuar]
- (3) [fshirë]

Rregulla 137 (më parë rregulla 134)

Qëllimi dhe përmbajtja: Paragrafi (3) i rregullës 137 (më parë rregulla 134) është fshirë duke qenë se u konstatua se krahas shqetësimit të shprehur nga paneli i Gjykatës Kushtetuese, ky paragraf nuk kontribuon thelbësisht në Rregulloren e Procedurës dhe të Provave.

Konstatimet e marra parasysh: Fshirja e paragrafit është rrjedhojë e konstatimeve të panelit të Gjykatës Kushtetuese në lidhje me qartësinë e kësaj dispozite (para. 191-193).

Rregulla 161 (më parë rregulla 158)**Statusi i personit të shpallur të pafajshëm**

Kur një i akuzuar i paraburgosur shpallet i pafajshëm, ai lirohet menjëherë, përveç se kur mbahet në paraburgim në mënyrë të ligjshme, ose vuan një dënim për vepra penale të ndryshme nga ato në lidhje me të cilat është shpallur i pafajshëm. Lirimi kryhet në përputhje me nenin 41(11) të Ligjit.

[(2) fshirë]

[(3) fshirë]

Rregulla 161 (më parë rregulla 158)

Qëllimi dhe përmbajtja: Paragrafi (1) i rregullës 161 (më parë rregulla 158) u ndryshua për ta bërë të qartë se një person i shpallur i pafajshëm lirohet, përveç rasteve kur mbahet në paraburgim në mënyrë të ligjshme, ose vuan dënimin në lidhje me një proces gjyqësor tjetër të Dhomave të Specializuara apo një juridiksioni tjetër - mundësi e cila parashikohet edhe në paragrafin 201 të Aktvendimit të Panelit të Gjykatës Kushtetuese (“përveç rastit kur një i akuzuar dyshohet dhe akuzohet për kryerjen e një vepre penale tjetër për të cilën nuk është gjykuar gjatë gjykimit”).

Konstatimet e marra parasysh: Paragrafi (1) është ndryshuar me qëllim përputhjen e tij me konstatimet e panelit të Gjykatës Kushtetuese (para. 201). Paragrafët (2) dhe (3) të rregullës 161 janë fshirë duke marrë parasysh konstatimet e panelit të Gjykatës Kushtetuese në lidhje me bazën ligjore për vijimin e mbajtjes në paraburgim të një personi të shpallur të pafajshëm (para. 204-205).